



Samþykkt fyrir ungmennaráð

Um verkefni ungmennaráðs Grindavíkur.

1. gr.

Ungmennaráð er ráðgefandi um málefni er tengjast ungu fólki á aldrinum 13 til 18 ára í sveitarfélaginu í umboði frístunda- og menningarnefndar.

2. gr.

Ungmennaráð hefur áheyrnarfulltrúa í frístunda- og menningarnefnd og kemur með tillögur um hvert það mál sem ráðið telur tengjast hagsmunum og aðstæðum ungs fólks. Ráðið fylgist með því, eins og við á, að stofnanir og þjónusta sveitarfélagsins vinni með hagsmuni ungs fólks að leiðarljósi. Með þessum hætti er leitast við að efla umfjöllun bæjaryfirvalda um málefni er tengjast ungu fólki.

3. gr.

Helsta markmið og hlutverk ungmennaráðs er;

1. að koma skoðunum og tillögum ungs fólks til viðeigandi aðila í stjórnkerfi sveitarfélagsins,
2. að gæta hagsmuna ungs fólks t.d. með umfjöllun og umsögnum um einstök mál sem snerta aldurshópinn sérstaklega,
3. að undirbúa árlegt þing ungs fólks í Grindavík í samstarfi við viðeigandi stofnanir og forstöðumenn,
4. að fulltrúar ráðsins þjálfist í lýðræðislegum vinnubrögðum og læri á stjórnkerfi sveitarfélagsins,
5. að vera ráðgefandi um framtíðarsýn í rekstri félagsmiðstöðva sveitarfélagsins,
6. að gera tillögur til bæjarstjórnar um stefnumörkun um málefni ungs fólks

4. gr.

Ungmennaráð tekur til umfjöllunar þau mál sem bæjarstjórn og nefndir sveitarfélagsins óska eftir hverju sinni og önnur þau mál sem ráðið telur nauðsynlegt að fjalla um í samræmi við hlutverk og markmið ráðsins.

5. gr.

Ungmennaráð hefur yfir að ráða sérstakri fjárveitingu, sem samþykkt er af bæjarstjórn við gerð fjáhagsáætlunar ár hvert, sem það getur varið til þinghalds, útgáfu, fræðslu eða annars sem henta þykir. Ungmennaráð fær greitt fyrir 6 fundi á ári og teljast hálfdrættingar í launum á við aðrar fastanefndir Grindavíkurbæjar. Það er að segja, ungmennaráðsfulltrúar frá hálf nefndarlaun.

Um skipan ungmennaráðs

6. gr.

Ungmennaráð skal skipað sjö aðilum og þremur til vara.

A – Tveir úr nemenda- og Þrumuráði í 8. - 10. bekk hverju sinni, formaður og varaformaður, og einn til vara.

B - Tveir fulltrúar á aldrinum 13-16 ára og einn til vara. Annar aðalfulltrúi er kjörinn í eitt ár og hinn í tvö ár. Varamaður til eins árs. Auglýst skal eftir framboðum. Verði frambjóðendur fleiri en sæti í kjöri, skal fara fram bein kosning meðal nemenda í Grunnskóla Grindavíkur.

C – Þrjú fulltrúar úr aldurshópnum 16 – 18 ára og einn til vara. Kjörinn er einn og tveir aðalmenn til skiptis. Varamaður til eins árs. Auglýst skal eftir framboðum. Verði frambjóðendur fleiri en sæti í kjöri, skal fara fram bein kosning á auglýstum framboðsfundi. Atkvæðisbærir eru ungmenni á aldrinum 16-18 ára með lögheimili í Grindavík.

Starfstími ungmennaráðs er september til júní.

7. gr.

Á fyrsta fundi ráðsins kýs ráðið sér formann og varaformann.

Formaður ráðsins stjórnar fundum og sér um að allt fari þar löglega og skipulega fram. Hann úrskurðar í ágreiningsmálum, sem upp kunna að koma út af fundarsköpum en skjóta má úrskurði hans til úrlausnar nefndarinnar. Fundarmönnum er skylt að lúta valdi formanns að því er varðar fundarsköp og góða reglu.

8. gr.

Ungmennaráð heldur a.m.k. sex fundi á ári, þrjú á haustönn og þrjú á vorönn. Ungmennaráð kemur í mars á hverju ári inn á fund bæjarstjórnar.

9. gr.

Sviðsstjóri frístunda- og menningarsviðs Grindavíkur er starfsmaður ráðsins og tengiliður ráðsins við bæjaryfirvöld og frístunda- og menningarnefnd. Varamaður hans er frístundaleiðbeinandi. Starfsmaður situr að jafnaði fundi ungmennaráðs með málfrelsi og tillögurétt. Heimilt er að boða aðra á fundi ráðsins til viðræðna um tiltekin mál. Jafnframt skal ungmennaráð óska eftir og leitast við að verða við beiðnum um fundarsetu annarra starfsmanna sveitarfélagsins þegar það á við vegna umfjöllunar um verkefni sem tengjast verksviði þeirra.

Um yfirstjórn ungmennaráðs

10. gr.

Bæjarráð úthlutar fjárhagsramma til ungmennaráðs í samræmi við samþykktan fjárhagsramma bæjarstjórnar fyrir hvert starfsár. Ráðið gerir starfsáætlun í samræmi við úthlutaðan fjárhagsramma fyrir næsta starfsár vegna verkefna ungmennaráðs.

Starfsmaður leggur fram í ráðinu tillögu að fjárhagsáætlun ráðsins, í samstarfi við fjármálastjóra, sem ráðið skal meta og staðfesta að sé í samræmi við starfsáætlun og markaða stefnu.

11. gr.

Formaður ungmennaráðs hverju sinni er í forsvari fyrir ungmennaráð um tillögur og áherslur þess eftir því sem við á. Starfsmaður ber ábyrgð á rekstri og stjórnslu ráðsins, þ.m.t. fjármálum og framkvæmd ákvarðana þess.

Um fundarsköp ungmennaráðs

13. gr.

Um fundarsköp á fundum ungmennaráðs gilda ákvæði sveitarstjórnarlaga og reglur um almenn fundarsköp.

Starfsmaður í samráði við formann boðar til fundar með dagskrá. Í dagskrá skal vísað til gagna um þau fundarefni sem til umfjöllunar eru eftir því sem kostur er. Dagskrá skal send til aðalmanna í síðasta lagi tveimur sólarhringum fyrir fund. Hægt er að boða til fundar með styttri fyrirvara með samþykki allra nefndarmanna og skal það bókað í upphafi fundar.

Heimilt er að taka mál til meðferðar í ungmennaráði þótt ekki sé það tilgreint í dagskrá. Þó er skylt að fresta afgreiðslu slíks máls ef einhver nefndarmaður óskar þess.

Mál skulu tekin til umræðu og afgreidd í þeirri röð sem þau eru á dagskrá nema formaður eða ungmennaráð ákveði annað. Afl atkvæða ræður úrslitum mála.

Formaður í samstarfi við starfsmann sér um að fundargerðir séu skipulega færðar í Gerðabók, í tölvu og á heimasíðu bæjarins og að allar samþykktir séu bókaðar nákvæmlega.

Undirritaðar fundargerðir skulu varðveittar hjá starfsmanni ungmennaráðs sem sér um að birta fundargerðir á vefsíðu sveitarfélagsins. Starfsmaður ráðsins ber ábyrgð á að tilkynna aðilum mála, sem afgreidd eru í ungmennaráði, um málalok.

Gildi samþykktarinnar

17. gr.

Samþykkt þessi tekur gildi með staðfestingu bæjarstjórnar 24.11. 2015.